

Պարտուցն ալ վըճար չըլլայ, պարտուցըն գաս դու հաւալայ,
Անճրկի լուբ գիս քեզ տայ, ապա քո բանըդ լինենայ:

Ի Չ .

Ժամ ժամ կուգայ ի վերայ, որ ելնեմ կանչեմ՝ Ո՞ր է նա.
Կենա երեսիս ջըրէն ես վախեմ թէ մարդ չիմանայ.
Անոր կամ ճատու պէտք է կամ պառաւ որ զայն գիտենայ,
Կամ մորուագալի կտրիճ որ գըլուխն անցած լինենայ:

Ի Է .

Եկո՛ւ քեզի նուռ մի տամ, կտրե՛ տե՛ս քանի՞ հատ ունի.
Ամէն հատի պագ մի տուր, աւելին տարամ թէ պիտի:
-Գընա՛, ծո՛ տըղայ տխմար, ես ըզքեզ խելօք գիտէի:
Ամէն հատի պագ մի տամ, ո՞ր է եղեր կամ ո՞ր տի լինի:

Ի Ը .

Այս աստընւորիս վըրայ երկու բան ողորմ ու լալի.
Մէկ որ սիրոյ տէր լինի, մէկ մ՛ալ գայ Գըրօղն ու տանի.
մեռածըն գեմ չէ լալի, որ ունի զիւր խոցն ալանի:
Եկէք զողորմուկս տեսէք, ո՛չ մեռած է ո՛չ կենդանի:

Ի Թ .

Ա՛յ իմ ըռանա խալաս, որ եկիր ի մեր մահալլաս,
Եկիր ու նոր սեր բերիր, լօք լըցիր կըրակն ի վըրաս:
Երթամ աղաչեմ զԱստուած, երբ եկիր՝ նա ալվի չերթաս,
Ձերեսդ երեսիս դընեմ, որ զեկած ճամբան մոռանաս:

Լ .

Երնեկ ես անոր կուտամ որ առեր զիւր եարն ու փախեր,
Ոնց որ ըզկարմունջն անցեր՝ ջուրն եկար զկարմունջն է տարեր,
Ձընիկ ՚լ եղեմիկ եկեր՝ զոտուընուն հետն է կորուսեր,
Աներ ու պաղչան մըտեր, ցորեկով դնչիկն է պագեր:

Լ Ա .

Ով որ սիրու տէր լինի ՚լ իր սիրուն ճարակ չիլինի,
Թող երթայ փորէ տապան եւ մտնու մէջըն կենդանի,
Սրտին դեմըն բաց թողու, որ ելնէ բոցըն ծիրանի,
Ով անցնի նա զայն ասէ՛ Սիրու տէր մարդըն կու վառի: